

Date – 01/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Mizoram hmui tura ruat Tripura Larsap Indra Sena Reddy Nallu chuan vawiin khan Selesih-a Vety College tlawhin thawktu leh loneitute nen hmasawna hrang hrang an sawi ho.**
- 2. Chief Minister Pu Lalduhoma'n Swachhata Hi Seva a hlawhtlin theih nan mahni zawn theuhah mitinin faina ngaih pawimawh a tul thu a sawi.**
- 3. Jammu & Kashmir Assembly inthlan thawh thumna atan vawiin khan tuang taka vote thlak a ni**
- 4. Prime Minister Narendra Modia leh Jamaica PM Andrew Holness te chu vawiin khan New Delhi-ah an inkawm.**

<><><>

MIZO GUV

Mizoram hmui tura ruat Tripura Larsap Indra Sena Reddy Nallu chuan vawiin khan Selesih-a Vety College tlawhin thawktu leh loneitute nen hmasawna hrang hrang an sawi ho.

Larsap thar hian KVK, Aizawl leh Selesih-a Vety College a tlawhna ah hian Mizoram Loneitu te tan hmasawna rahbi tuk sak ngei turin a fuih a, Loneitu leh huanneitute hmalakna zawtin tam zawk leh hlawk zawka an thlai leh thei te an tharchhuah a, an deh ral theih nan KVK lam mithiam te rawna chang hre turin a chah a. Loneituten tunlai thiamna mila an lo leh huan bakah an ranvulh chungchangah training tel tam turin a chah a. Loneitu leh huan siam te tan Training hi uar zual sauh turin a chah hlawm bawk.

Larsap hian inkawmhona hun a hman zawhah KVK, Aizawl Exhibition centre tlawh nghalin, KVK kaltlanga hmalakna hrang hrang, Buh chi hrang hrang, thlai leh thei hring, pickle, hmanraw hrang hrang, Lei tha, Rannung thahna hlo phohchhuah te chu a en nghal bawk a ni.

Larsap hian KVK, Aizawl demonstration farm fangin, an soil testing Laboratory, Vermi-Compost unit, Sangha dil leh Thlaichinna greenhouse hrang hrang a tlawh bawk a ni.

Larsap hian KVK a hun a hman zawh hian Ran chi hrang hrang vulhna bakah Dept. of Livestock Production Management tlawhin hmasawna hrang hrang an sawiho bawk.

<><><>

SWACHHATA HI SEVA

Chief Minister Pu Lalduhoma'n Faina beihpui Swachhata Hi Seva a hlawhtlin theih nan mahni zawn theuhah mitinin faina ngaih pawimawh a tul thu a sawi.

Swachhata Hi Seva puala ram mipuite hnena thuchah a sawi na ah Pu Lalduhoma chuan kum 10 chhungin faina leh thianghlimna bakah bawlhhlawh thliar fel kawngah Mizoram in nasa takin hma a la a ti a, hun rei tak hnawmhnawk lo awm khawm tawh, leilung tichhe thei te chu felfai zawka thenfaia a awm theih nan hmalak niin fai taka enkawl chhonzawm tum a ni a ti a, he campaign hmanhian bawlhhlawh sawngbawltute, hmun tifaitute leh bawlhhlawh paihtute sawrkar laipui scheme hrang hrang hmanga an hamthatna tur ngaihtuah sak an ni a, a thlawna in entirna Health Camp District hrang hrangah kalpui a ni tih a sawi.

BYTE CM.....

Swachhata Hi Seva puala faina beihpui kalpui mekah sawrkar pisa leh zirna in hrang hrangah Faina hnatlang neih mek a ni a, Vawiin khan Gauhati High Court, Aizawl Bench, MINECO-ah Faina beihpui pual hian hun hman a ni a, Justice Nelson Sailo leh Justice Marli Vankung, Gauhati High Court Judge ten an telpui a, nitin hun hmanna faina nunpui a pawimawh thu leh kalkhawmte chu an nun theuhvah faina beh tel tir tura hrilhhirat an ni.

Hnahthial ah chuan tukinah faina kawngzawh neih a ni a, Hnahthial SDEO Pu S.Lalthanzuala chuan faina puala kawng an zawh chhan chu sawrkar laipuiin faina a ngaih pawimawh vang leh India ram chu ram fai leh thianghlima chhuah a tum vang a nih thu a sawi.

Lawngtlai ah chuan KVK Lawngtlai bul tum in Government Middle school leh Government Primary school, Chawnhu naupangte leh zirtirtu te nen a huhova faina beihpui hman a ni a, Kawngpui dung, School leh a chhehvel bakah khawchhung tihfai a ni bawk.

<><><>

CM AT SERCHHIP

Chief Minister Pu Lalduhoma'n vawiin khan 'Serchhip District Secondary School Sport 2024' hawngin, Covid hripui len hnuah Infiamna lamah Mizoramin hma an sawn chak hle tih a sawi.

Serchhip Sports Complex-a hun hmanah bialtu MLA ni bawk Chief Minister Pu Lalduhoma chuan National leh International level ang pawhin Mizoramin hma a sawn thu a sawi a, hemi ruala Serchhip District-a Sport discipline hrang hrangte pawhin hma sawnna ropui tak a nei zel chho chu lawmawm a tih thu a sawi bawk. Hmunhma mumal neih loh vanga association nung lutuk lote pawh sorkar chuan an hmasawn dan tur ngaihtuah chhoh zel a tum tih a sawi a, ruihhloin thalaite nasa taka a tihbuai laia sorkarin hriselna leh kawng dik zawh thei tura zirlaite hun tha a buatsaih sak chu a hlu hle tih sawiin an talent haichhuak tura tih tak zeta bei turin a fuih a ni.

Sports hawwna inkhawm hi 'Serchhip District Secondary School Sport Committee Chairman, Pu David Laldintluanga'n a kaihruai a, Serchhip Dist. chhunga school 19 atangin zirlai infiammi 600 telin Zirtawpni thleng a aw hawn a ni.

<><><>

OLD AGE DAY

Social Welfare Minister Pi Lalrinpuii'n khawtlang nun nuam leh zahawm a awm theih nan kum upate zah chu mi tin te mawhphurhna a ni a ti.

Kum Upate Ni puala thuchah a sawina ah Social Welfare & Tribal Affairs Minister Pi Lalrinpuii chuan ram changkang apiangah kum upate ngaihhlut leh ngaihsak nachang an hria a ti a, hnam fng apiangin an vanglaia an thil tih tawn te hlut sakin an chawimawi thiam em em thin tih sawiin khawvel hmasawn zelah Mizoramah pawh upate an tam tial tial a, Kum upa sing 7 vel an awm tih sawiin kum 2036 ah kum upa nuai 1 an tling thei tawh tura chhut a ni a ti bawk.

Minister chuan Mizoten aia upa zah chu hnam nunphung, thurochhiah pawimawh tak, mizote min ti mizo tu a ni tih hre thar theuh turin a duh a ti a, khawtlang nun alo nawm zawk theih nan kum upate zah hi mi tin mawhphurhna a ni tih a sawi.

BYTE MINISTER

Upate ni pual hian NHM hnuaiia National Programme for Health Care of the Elderly (NPHCE) bultumin Central YMA Conference Hall Tuikhuahtlangah hun hman a ni a, Health Department Secretary Pi Sangchhin Chinzah chuan MUP member-te chu an hlutna hmang thiam tur leh tawn hriat ropui tak neitu an nih avangin ram tan an hlu hle a ti a, khawtlangah ngaih pawimawh an hlawh lehzual theih nan mi tin te tan la turin a chah a ni.

Upate Ni pual hian District leh Mizoram hmun hrang hrangah hun hman a ni bawk.

<><><>

ZPM & HPC POLL ALLIANCE

Sinlung Hills Council inthlan kumina neih turah ZPM leh HPC chuan wawiin khan thawkdun turin inremna an ziaik.

Thawhhona thuthlung hi Zoram People's Movement President Pu Lalliansawta leh Hmar People's Convention President Pu Rohringa te chuan hming ziah hnan-in an pawm tlan thu an sawi a,

Pu Lalliansawta chuan ZPM leh HPC te chuan kum 2023 Mizoram MLA inthlanpuiah thawhhona thuthlung an lo ziah tawh thu leh MLA bial pathum Serlui, Tuivawl leh Chalfilh Bial-ah te an lo thawk ho tawh tih sawiin kum 2024 Sinlung Hill Council inthlanpuiah thawh ho zel ni se tiin inremna an siam a ti a, duh dan in ang lo leh beisei dan in ang lo siam rem zelin lungrual takin thuthlukna an siam chhoh theih thu a sawi.

Vawiina ZPM-in thuchhuah an siam a an tarlan danin, ZPM leh HPC tang dun-in Sinlung Hills Council-a sorkarna an siam thei a nih chuan HPC Headquarters chu Sakawrdaiah ngei dah an tum thu leh kum 1994-a Memorandum of Settlement bakah Sinlung Hills Council Act 2018 te ti hlawhtling turin hma an lak tur thu bakah Sinlung Hills Council thuneihna mumal taka siamsak an tum thu an tarlang bawk.

Sinlung Hills Council hnuaiiah hian bial 12 awmin MLA bial 3 a huam a, kum 2019 khan inthlan hmasa ber neih niin MNF leh HPC tangrual chuan sawrkarna anlo siam tawh a ni.

Tun dinhmunah hian ZPM leh HPC ten sawrkar siam mekin kumin inthlan lo awm turah pawh an thawk dun dawn a, ZPM in candidate bial 8 changin HPC in bial 4 an chang dawn a ni.

<><><>

POCSO SENTENCE

Pu Vanlalenmawia Judge, Special Court POCSO chuan tunkar thawhtanni khan a farnu kum 14 mi, khuma a muhil lai pawngsualtu Malsawmtluanga, Lunglei chu thiamloh chantirin kum 20 chung tang tur leh cheng sang 3 chawi turin a hrem.

Court thuchhuah tarlan danin thla hmasa ni 29 zinglam dar 2:30 vel khan Malsawmtluanga, Lunglei chuan a farnu kum 14 mi, khuma a muhil lai chu a pawngsual a, Malsawmtluanga hian Zu, Alprazolam leh Heroin te a tih pawlh thin niin thuhretu ten Court an hrilh a ni. Engemaw chen thubuai hi ngaihtuah niin thuhretu Court a koh an nih hnu in September ni 30 khan Court chuan Malsawmtluanga hi Section 6, Pocso Act hnuaiia thiamoh chantirin kum 20 chung tang tur leh cheng sang 3 chawi turin hrem a, a pawisa chawi tur hi a pe theilo anih chuan ni 10 dang tang tura tih a ni bawk.

<><><>

FARMER SOCIETY

Cooperation Minister PC Vanlalruata'n thlai thar pali- Sawhthing, Aieng, Hmarcha leh Hmunphiah sawrkarin lei a tum avangin khaw hrang hrangah Farmer Society 600 chuang din a ni tawh a ti.

Agriculture leh Cooperation Minister ni bawk Pu PC Vanlalruata chuan sorkarin kumina thlaithar pali a lei tur chu a hmanhmawh thlak avangin hnawhsarum taka kalpui a ngai tih sawiin Society pawh a tul dan anga din niin hemi tur hian thlai thar pali an chinte chu an thar zat tur ang society-ten khaw tinah an chhinchhiah thu a sawi a, heng thlai lei tur hian a leitur pawh an be nasa tawh tih sawiin nasa takin hma an la tih a sawi.

<><><>

CM INAUGURATES 3D DENTAL LABORATORY

Chief Minister Pu Lalduhoma'n vawiin khan Govt. Serchhip College-ah PM DevINE sum atanga siam 3D Dental Laboratory thar a hawng.

Laboratory thar lawmna inkhawm hi Serchhip DC Conference Hall-a Pu Lalrinzuala, Addl. DC kaihhruaina hnuaiia neihah Chief Minister Pu Lalduhoma chuan 3D Dental Laboratory thar ang chu hmarchhak state tinah dah thar vek a ni a, AMTRON-te'n Guwahati atangin an thlung khawm dawn tih a sawiin, training pawh anni hian an rawn buatsaih thuai dawn tih a sawi bawk. Serchhip district hospital building thar tur sak mek a tlawh thu sawiin, PGCIL in an CSR cheng vbc 21 an pek bakah sorkar laipuiin a phal chin cheng vbc 50 an pek belh ang a, cheng vbc 71-in District Hospital thar tha tak neih an beisei tih a sawi.

He Laboratory hi Serchhip District Hospital-a dah tur a ni a. District Hospital hi sak thar mek a nih avangin 5G Internet Service awmna Serchhip College-ah hian bun rih a ni. Hemi rual hian District Hospital-ah Mobile ECG Device leh Drip Monitoring system te pawh hawn an ni.

Chief Minister hian NEC digital tourism project hnuaiiah Serchhip thalai mi 15, IHM Delhi-a hospitality sector training pekte hnenah certificate a hlan nghal bawk a ni. He hunah hian Serchhip bawrsap Pu Paul L Khuma leh AMTRON Adviser Ashish Anand-te pawhin thu an sawi a ni.

<><><>

J&K ELECTION

Jammu & Kashmir Assembly inthlan thawh thumna atan vawiin khan tuang taka vote thlak a ni a. Tukin dar 7 atang khan vote thlak niin hriat theih chinah tlai dar 3 thleng khan vote zaa 56.1 a tla a ni. Inthlan thawhthumnaah hian polling station 5060 ah vote thlak a ni a, District pasarih huamchhunga Assembly bial 40 ah inthlan a ni a. Venhimna khirh taka kalpui a ni.

Puan tawh angina J&K Inthlan hi thawh thuma neih niin thawh khatna leh thawhnhina te hlawhtling taka neih alo ni tawh a. September ni 18 leh ni 25 ahte khan vote thlak niin vote zaa 61.38 leh zaa 57 a tla a. Inthlan vote tla te hi a rualin tun thla ni 8 ah chhiar a ni ang.

<><><>

PRIME MINISTER MODI & JAMAICA PM

Prime Minister Narendra Modia leh Jamaica PM Andrew Holness te chu vawiin khan New Delhi-ah an inkawm a. Ram pahnihte hian thawhdunna tur inremna thuthlung chi thum an ziake a. MoU an ziahte hi Digital Infrastructure, Cultural Exchange leh Sports lama thawhdunna tur te a ni a.

Thuchhuah intawm an siamah Prime Minister Modia chuan Jamaica Prime Minister Holness-an India a rawn tlawh chu a ngai pawimawh hle a ti a. Tun tum hi Jamaica Prime Minister hian India a lo tlawh vawikhatna anih thu sawiin ram pahnih inlaichinna chu hun rei tak ata tawh a ni a ti a. Mipui rorelna democracy ngaihlu leh mipuite inpawhna tha tak avangin inlaichinna tha tak an nei a ni a ti.

<><><>